

四庫全書

集部

欽定四庫全書

集部
松泉集卷一至三

主事_臣汪彥博覆勘

武英殿纂修編修_臣俞廷樞

原序

贈太子太師冢宰休寧汪文端公既歸葬令子承沆以公文集若干卷述公治命屬綸為之序綸惟古稱文章經國之大業不朽之盛事前世閎儒碩輔本其謀猷蘊積發為著述粲乎與典謨雅頌同風未有岐文章事業而二之者然當締創之時勲施懿燦則事業可以概文章際昇平之運黼黻休明則文章可以徵事業論世者不揆本末猥云二

者難兼豈知言哉公於雍正間用徐文定公薦起
諸生預修明史既成進士數歷清華有聲在館閣
今皇帝紹登大寶公尤以文學受知入則居鑠闥參樞
務出則列陪扈承

顧問優禮便蕃于古無比其最殊異者

上嘗臨顏真卿書朱巨川誥敕軸中有典掌王言潤色
鴻業貞廉可以勵俗通敏可以成務云云

召對時輒以

賜公

上鄭重示意

駕幸盛京從官進和詩

御製褒目公有畢竟老成還獨步之句隨

靜宜園

賜御臨董其昌畫卷

跋語有在公匪懈割愛以賜之句暨公卒官

上親臨其喪

金史卷之八十二
原序
詔諭有云學問淵醇文詞雅正

賜奠有云贊治常資理論文每契神嗚呼盛哉由

上知公之深則公二十餘年所以克副

上知者故可想見且公文具在天下知與不知皆能手

胝口沫又奚竦綸之一言顧惟公早年寓武進綸

在髫髻即知嚮往公繼以詞科通籍入直

內廷私幸于公修後進禮得稍窺公津涉崖畧暇時

獨喜與綸從容論文咍咍作鄉語而綸亦自忘其

輩行之晚也間請質于公曰在昔詞臣妙選以代
言為職今

聖天子文思臨御統備

君師遇

國家大典禮大勲伐非重以

奎藻發皇則事辭弗稱其下之當直應奉者度不越署
名賡和承

旨寫宣而

睿學高深妄意持涓璣之微輸瀛附嶽益悚以懼故論
翰林之榮與其不易為者並什伯于古人又曰宋
羅鄂州有言作文不在詞澁言苦使人難讀在于
高其理古其意竊以謂公文足當之而豈直文焉
爾已公笑曰某則何敢云然然子言知節要者惜
不令承學之士座書一通耳嗚呼公之通懷遂養
又何如公精勤奉職退然若弗勝生平持躬服物
篤學獎士諸大節他日當采摭誌狀上之史館綸

特條系耳目親習數事誦公遺志俾私淑者知公
文所自來傳于導言之義乾隆戊寅武進後學劉

綸拜撰

丁

欽定四庫全書

松泉集總目

卷一

賦

卷二

頌

卷三

雅樂章

卷四

議

卷五

表

卷六

策問

卷七

書
啟

卷八

序

卷九

序

卷十

序

卷十一

記

卷十二

記

卷十三

贊箴銘

卷十四

跋

卷十五

跋

卷十六

跋

卷十七

跋

卷十八

跋

卷十九

傳書事
行狀
行畧
神道碑

卷二十

說雜

松泉集總目

欽定四庫全書

松泉集卷一

吏部尚書汪由敦撰

賦

平定金川賦

謹序

皇帝紀元乾隆之十有四年春二月金川莎羅奔郎卡
請命元戎率其徒醜爾伏軍門誓奉約束永戴

恩德號籲哀禱出於至誠經畧大學士忠勇公臣傅恒

承

制納降露布驛聞自闕廷達於康衢若臣若民同聲
歡忻踴躍抃舞

天子曰惟

昊天

列祖相予有家詒慶襲祉且率我

文母之啟迪以集是勲也爰洛禮臣備舉慶典於時羣
公常伯鋪鴻藻信景鑠作為雅頌譜樂府鐃歌丕宣凱

樂皇皇洋洋極藝苑之大觀矣臣竊惟

聖天子之盛德鴻烈焯爍絃埏臣庶罔弗共覲至於黜
燭先睹仄席遲漏乾健而行自強不息與夫

淵衷密運

睿謨神捷先機遠燭動中竅會臣等日侍

清光雖末由仰測高遠而覩記親切有非外廷所能具
悉者謹不揆侖陋敍為古賦冀以宣述萬一

有梁益下士浴於中樞大夫曰繫昔先王經野畫疆曰

蠻曰夷曰要曰荒示羈縻而弗絕固荒忽而不常惟彼
金川僻界荒裔其地則絙橋索引鬱岷嶰巖不足版圖
隸也其人則騰蹕倏呻咿喁蠢蠕不足編氓字也有跳
而獠如癘自噬有攘而逋如竄於窬顧迺勞銳師而事
遠攻得無初計之未審所從歟大夫曰吁豈謂是哉我
聖清之廓

帝紘而恢

皇綱也東爍西耀南熿北煬惠液浸衍旁魄配藜舍生

之羣靡不游原而泳沫何蓂爾之弗率乃思逞於鄰封
太陽曜不能強矇眊以視明和風扇不能化鵠鷖以好
音今夫桃關以西諸番星列牙錯鱗次蜂房螳垤其輶
脅歸懷藉帡幪而仰維挈也非一日矣弗衛安庇弗翼
安暨殖嘉穀者去螟螣擢良材者剪荆棘天戈所麾固
將建威銷萌初非利土宇以恢疆張撻伐而校力也時
則間帥失圖老師罷衆就駢戮以伏辜究威柄之所用
載洛心膺相惟一德載授符節以匡以敕出飛黃於天

育賚溫毳於尚方旌旗郅偃驂騮騰驤

天子闢閭闔禡靈旗次虎帳手御卮仿古禮之推轂目
送其騁步於中達爾乃歷燕趙馳并晉邁咸秦以直指
輶劍閣而徑進斯時也日在峻狼陽來復初風饕蝟毛
霜嚴裂膚元宰抒衷赤於天稟勵匪躬以忘軀均勞士
卒分苦隸徒束驕馬以凌絕險陟層冰如履夷塗羌談
笑而步百里賈餘勇其有餘然且朝拜章奏夕治軍書
常申旦以廢寢復昧爽而長驅伊古之名臣良將歷選

指數胥遜謝而蔑如也迨蒞和門軍律是申川巖為之
動色壁楯為之更新狡謀伺間奔命貌馴數罪狀以揮
刃馘妖狐以橫身凡逖聽而環視者莫不蹙竦警怖愕
眙而瞵眴嗶嗶王旅如江如潮塞雲棧跣宮堯方厚集
以揚鋒行躋岨而焚巢賊徒既剝腹心而落角距謂將
翹足而隕覆也倉皇號譟無間宵晝元宰以聞

帝用惻然矜彼蒙矜湔而宥之重以

聖母之慈訓憫其窮而無救也亟

詔班師曰武不可究賊方恐懼惜不知其所托命桓桓
岳帥夙稟教令走丐更生扶服延請釋我几俎援我窗
竄導逆徒御由黨壩而果踐其境靡約不從弭耳聳聽
帥曰俞哉我

天子神聖固有以孚豚魚而格臬獍也用達厥悃而佈
諸元宰乃除道築壇清壘張幕蕪薌吹螺梵樂間作番
酋率衆成列以待元宰之至稽顙樹額蛾伏拜膜自陳
罪惡倖脫齊斧而出鼎鑊信明誓之旦旦奉六條之成

約雪嶺夷金川涸誓不渝慄祇恪載獻其琛南金滿橐
瞿曇寶相獅象瓔珞元宰宣

詔旨而示大信振

皇靈之灼爍番酋忻喜過望悔歸遲而內忤於時雲日
開明祥和綢繆巴兒賓叟咸舉手加額曰自有此土所
未嘗覩信天人之協應而陽春之彌浹於區宇也大凱
既奏式邁其歸擁豹尾之雙戈控紫韁之陸離晉上公
之顯爵煒殊錫之歲筴聚命服之加隆酬偉伐而匪私

且獨不見夫錦江玉壘之頌德而無已者乎或忤於衢
而歌於市如戀慈母變彼赤子香花載路企踵俟俟者
延亙千里或列姓名銘蓋製衣却弗能止丞相祠堂竝
列以祀伊忠誠之感有以深入人心且勿謂蚩蚩者愚
蓋同聲一辭謂

聖天子之知人善任使也

天子方迓釐於

昊穹歸美於

祖德於

廟於

陵寢祀祇飭王公卿尹咸思熙鴻號以昭桓撥顧先已
奉

諄誨之謙沖鬱輿情而抑默懿

聖母之慈恩晉

徽稱而增福履滋保乂以誠民奉

璇闈之燕喜於是

御紫宸而受賀中外禔福頌明良而賡喜起縹雲章
鴻筆刻琬琰紀事實典謨喬皇襲六為七告成成均豐
碑屹萃歷千萬禩胥誦

聖謨之洋洋而流

德音之秩秩必若所言棄彼度外則何以闡綏世之長
御閣覆幬之遠量且何以發其天良俾革心而內嚮也
又何以昭示遐邇使姦狃者知所創而強梁者知德化
之不可抗也如論夫兵力之雄則羽林攸飛雲輶臨衝

輕武利趾躡壁躡空伊涼之健卒滇黔之選鋒索倫烏
拉突騎元戎莅颯卉翕趨捷鴻網器用之利則黃間赤
羽開石貫墉應弦馬蹕發必洞胸輕甲繡襠吳綿疊重
韞逾兇犀能禦火攻矧夫揚威巨礮輕裝九節赤堇千
鈞圓瓜隕颺雷礮電飛迺裂迸滅杳莫測其神奇亶掃
迹於一瞥何堅不摧何阻不挾若是乎其銛利而盪軼
也間小試於巴郎隳印籠其半折則使中峯飛度破竹
振籜設奇謀之得展固將輟藉而轉轢蓋嘗執奏至於

再三而

聖天子施解網之仁運止戈之畧却逸足於中路拘餘
怒而迴薄良以攻昧而撫順予善而棄惡闔大造於無
外柔異類而綏不若故曰天因人聖人因天勢如轉規
謀如湧泉兵法曰全勝不鬪大兵無創天以阻深習昧
俾茲異種得卯孕煦字於一方夫豈人力所能戕故力
雖雄弗究其用器雖利節之以制戰而後服不如不戰
而自屈也度蘭津而為它人不如伐其心而予維新也

日凜凜乎佳兵黷武之戒而時行時止知進知退所謂
至誠如神無遠弗屆其懷德畏威者視獻俘執馘為更
倍是豈管窺蠡測所能仰逮者哉系曰堯曦晶兮舜風
暢參巍巍兮廓蕩蕩世曼壽兮延景貺梁益下士乃呀
然自失曰蓋自中和樂職宣布之詩既闕未嘗聞斯懿
美今飲於醲和飽於醇德大夫復覺以至誼仰歎悅服
幸哉獲邁乎斯世

秋塞大獵賦

謹序

乾隆十有四年秋

皇帝獮狩於塞上七月初吉奉

皇太后鑾輿發軔於京師 諸皇子皆扈從經熱河抵

木蘭蒙古王公額駙台吉鱗集迎覲率徒衆簡精銳以
從事於 行圍三驅禮成彌月旋軫臣叨侍

清蹕獲覩羽獵之盛竊伏思在昔上林長楊近屬畿甸
之內動稱殷天動地野盡山窮故或恐啟後葉之侈靡
或恐農民不得收斂此相如揚雄之徒所為雍容諷諭

冀覺悟於一得也令獲生於今日仰觀我

皇清之拓迹垂統

聖天子之不揚光烈將必睜焉失所舌橋而不能下臣
才孱不足揚厲

鴻休彰明其所以顧遭逢之幸不可以默謹獻賦曰
歲在屠維月惟夷則白精莅辰金官奉職

天子順時節而布令馬比物而士齊力七萃洗橫以前
驅招搖穆禪而直北時則禾黍鋪榮嘉穀被隴疑疑或

或挫挫矇矇彌平疇而無際蔚雲合而濤湧一莖九穗
未足陳太史之瑞兮實穎實粟老農幾不能名其種亘
高原下隰而不可辨兮由郊圻以達乎邊陲戒衛士之
蹂躪引駢馬而避之紛萬寶之在目雖野衽錦穀谷填
璵璣無足以喻其絢爛而陸離宜

乘輿之按節而神怡也爾乃歷黃圖經赤縣次 離宮
即 行殿仍衢室之

前規安樸素而戒營繕覽古北之雄關朗天門之四扇

襄羊乎避暑之清都弭

翠華而息晏寥宇廓清露溥馬蹻蹻士桓桓林衡翹首
而待命典澤戒事而守官長矛萃縱迺卒澶漫

天子乃輶唐夾而御騷裏星陳天行以幸乎木蘭伊竝
塞之名王襲衣冠者累百奉湯沐而親肺腑荷

累朝之醲液燁

神武之健行震

天威之赫奕匪徵發期會而奔走來庭會青城而有繹

貢飛黃而效責驅虢虎而執役益以索倫狡騎期門禁
旅追風迅發開石飲羽按轡如怒控弦如舞左旋右抽
忽仰忽俯恒擇肉而命中苟橫驚其必取爾乃申之以
軍律聯之以偏伍越重岡凌深阻超澗壑躡榛楛衆屬
目乎前旌肅進止其有序少焉呼聲謹重圍合四纛馳
千騎市首尾應遠近接驢駢轡轡涕渭迢還封狼跳躑
而竄突黃羊騰希而競捷元熊睨暘而鼎鬪顧兔狡脫
而輕躡麋麋麋之屬總總搏搏拄角交項踢蹴而困

懾乃抽荆蒲彎天弧麗龜決脰自髀達髑試應弦於壹
發殪猛虎於負嵎將以示

威容於誓御肆標佼於公徒故埵視嶄巖塊睨峩嶩而
未嘗不範我之馳驅已乃他他藉藉充牣周陆念効獲
之孔多命弛圍而舍諸符解網於天乙邕惠風於騶虞
聿計鮮而頒禽紛駝載而車輸夫乃知練戎校武異夫
從獸之為娛也昭仁秩禮異夫竭澤而不留其有餘也
間從掌故竊聞夫木蘭之所自焉其地也南襟灤江北

枕興安左控巴林右引奈曼翁牛特喀喇沁諸番部之
環繞而碁布者儼拱衛於畿寰其山則嵩萃巖嶙巖嶙
巖嶙有宮有霍有岌有岷龍從乎龍堆千疊之崇顛其
水則汨湓渾沸潏潏瀆瀆為沮為澤為檻為汎潛演乎
羊腸百折之迴川凡毛角蹄遠之儻儻俟俟者莫不蕃
字衍息於其間木則樺靡留皮松仍落葉黃榆望秋而
飄實丹楓經霜而眩睫其他交柯挺幹與夫蒙茸蒼歲
者復蓼葍而蒞獵其陽則紫菊金蓮揚葩含芬敷陞緣

漬其陰則嚴霜冱冰慘廩凌兢白草鬍鬚蓋數百里之
內旬日之中而氣候判乎其不同倏片雲兮散漫灑凍
雨兮溶濛或密霰兮交加更飛電兮相攻菑畲不可冀
其有獲井畝不可即其田功是以界以虎落殊其疆索
匠氏不營司空弗度殆扶輿融結之奧區故外藩不敢
私有而以供靈囿之表貉緬惟

聖祖之長駕遠馭荒高山於天作於鑠哉我

皇之紹休繩武拓戶牖於大漠撫列藩而浹之以霽洋

咸鳧趨而雀躍且方今蓬燧銷聲靈爚賓熨革心候尉
謹約梯航琛賫肖翹咸若安可以履泰而忘危懷安而
示弱仰

聖蹟之孔彰煥

遺徽其如昨故不憚涉埃壒而席戎鞍冒風霜而勤旃
幕即麟趾之振振且豫教習勞而恢之以雄畧不然夫
豈不知

九重之為安而端拱之足樂也况夫奉

安輿侍左右日靡間於省覲佳辰屈而上

壽視膳給鮮以笑以侑至於

勅幾政披章奏先晨鐘而求衣遲歲筵於夕漏通萬里
於指掌固八荒之在宥洵

王者之無外沙磧曾不殊於宮囿更復

飛毫拓韻颺翔雲驟翩若游龍炳若綵繡雖游藝之餘
間有以知

神功之日懋尚復進角觥而決勝張畫侯而志毅蓋

卷一
睿哲文明信

天縱而時敏而健行不息則純嘏之多益而單厚由是觀之不闡

鴻模顯號也承歡

慈豫廣孝也垂裕少成至教也綏懷屏翰洪造也載績武功要道也行慶頒賚優勞也一舉而諸善備焉此其為

聖天子之大獵而翰林子墨者流固不啻持螢爝而當

曦曜也頌曰廣甸膺膺

皇武履兮麇麇麇麇紛若跂兮我士孔武猷以俟兮躬
桓藩輔執鞭弭兮式歌且舞惟

天子使兮湛露斯漙胥燕喜兮內訓外撫具衆美兮嗣
服

仁祖後先一揆兮昭茲來許多受祉兮

哨鹿賦

謹序

哨鹿蓋索倫舊俗惟精於獵者能之

聖祖仁皇帝妙解其術歲以白露之候晨興

親舉高年弗倦衆蒙古王公從獵者驚傳以為神我

皇上行圍之次擇地數往且

御製賦述之雖未習其事者讀焉不啻身歷而熟究也

非夫盡物之性察物之情而文足以達難顯之隱者孰

能與於斯臣承

命授簡踧踖失措謹獻賦曰

偉中林之攸伏紛或羣而或友當白露之既溥候氣至

而挾偶牡僊僊而游牝牝濯濯以求牡恒引脰以長鳴
交應聲而疾走既類別而區分儼畫疆而據守怵同儕
之我先猛奔集而恐後蓄忿妒而狷疾貪無厭而廣取
乘高騫其越岡就卑宛其在藪恃強焱捷以角逐迎合
競進而膠糾爭前騰踏以奮迅屢舉厲乃而抖擻揆厥
聲之多端吻掀唇而呿口曲者如語直者如詬長者如
嘯遽者如吼虞人以射獵為耘耔老更事於歲久匪弋
獲之為長契性靈而狎狃是以殫精竭思為哨鹿之術

焉以坐致而巧誘也時則嚴寒襲肌濃霜沾衣月冉冉而欲墮星耿耿而未稀邃谷聞其幽杳陽崖閱其朝暉蒙茸叢密聲確徑微林無雨而雪雪草不風而萋萋乃屏徒御却驂駢弛夏服寢忘歸象首戴角反裘蒙皮三兩為耦輕躡潛移禁聲斂跡伏伺忘疲俄遠音之噉爾時迴出於烟霏爰舉長哨匪笳匪角如倡如和忽徐忽數鼓中氣以歎激縱善辨其罔覺更順音以頻易恍相招而諧樂斯排突而徑前魁雄特之卓犖擢高足之伎

伎仰抗首而橫恣冒先馳以矜長要衆雌而竝至震疾
叱以驚却瞪睥目而直視尚乘興而顧戀鬱雄心於一
試昧深機之潛伏似吞鈎而貪餌斯時也藉草自翳偃
側若僵屏息傍晚察於微芒忖疾徐於遠邇商分判於
低昂神機剗其雷駭立顛隕而洞吭或髑髏之小劒仍
決起而踉蹌終犄角以就獲寧漏網而遠颺羣匹駭其
迸散雜蹂撞而起驤苟趨疾而旁騫羌遽引而披攘亦
逃生而倖免釋逋竄於窮荒應節度而巧合審為樂之

多方原夫聖人有作利用畋漁網罟矰繳义簇車徒冥氏穴氏山虞澤虞盖博取以備物獲三品而充廚亦順時而行令匪耳目之為娛至於鶴因媒而鍛羽雉應驍而碎軀狡同類之傾詐宜仁者之弗圖豈若呈妙解而捷得奏神技於一呼旋首頽而臆仰灑毛血於平蕪又何事騁驕騶於廣甸張羅畢於周陆信哉物致其精術神於用勤弗辭勞動而皆中窮變態於擇音釋覆蕉之觚夢補千古之闕文振

鴻篇而卑屈宋體至道以研幾懿五德之兼綜亶

智勇之首出擅

多能於天縱藐侍臣之命劣惟鞠脰而莊誦固不待獻
司原之良箴奏長楊之嘉頌

後哨鹿賦

曉漏沉山月小紅燈明京薪燎

天子方御紫獵乘腰褭出旌門兮逶迤即長薄兮深杳
期門攸飛之倫肩神鎗負象首鞭弭索鞬奔走先後聽

隔嶺之呦鳴覓前山之羣友於時嚴霜未結山霧初低
谷風凜冽林靄淒迷識途信馬遵路緣蹄觸響知石聞
湍識溪百爾危蹕鵠立遙俟乃有芻蕘野夫蹢躅而前
曰蓋聞古帝王清道而行大昕而出鸞旗在前傳警聲
蹕展輦授綏動必以律僕御戒嚴尚凜奔軼翳哨鹿之
可娛羌無關於政術顧乃披蒙茸踐蒿萃熊羆所馮虎
豹所窟猛噬直前伏莽竊發負險咆哮乘人倉卒此賈
山所由致戒於馳獵而相如殷殷獻規於銜檠也諸大

夫食鼎鐘都貴仕旅進旅退曰俞曰唯借曰未知惜前紀也知而不言秦越視也若謂吾豈無心力不能止退有後言持祿奉已遇茲堯舜之君顧安忍出此乎時則庶尹常伯盱衡而言曰惡子何言之過也今夫泛江海者不以波濤之險而迴橈登峻坂者不以憂駕之虞而脫轡何則智者恒預防於先事而勇者必禦患於有備獨不聞掃穴之神鎗固莫當之利器乎使其聞鏖殺之超騰遽逡巡而却避是將懼陸梁而戢戈矛畏強禦而

弛法制其何以為治歟若夫沙苑五花渥洼汗血越嶲
絕以如砥捐重巒以為埒邁空濶以奮迅遇蟻封而旋
折縱送惟時疾徐按節記曰不躡於山而躡於垤履康
莊夫且致戒更何虞於嶢嶢之蹉跌且夫哨鹿之為技
本索倫之舊俗陋罟罝之周章息長圍之馳逐飾同類
之殊羣曼長聲以相屬遂尋響以斯奔將直前而力角
蓋深中其所忌而倏乘其罔覺舉神械而命虔駭電發
而颺速用明智以坐獲懲驕妒而致戮苟取順而失禽

弗窮追而遠颺譬意釣之忘竿豈夢求於蕉覆夫其指之以類取之以義逸以待勞出其不意此克敵之長計也判遲速於俄頃量低昂於方寸揆地形之遠近究物理之利鈍此制事之大分也

聖哲必因時而熙績

仁主恒由舊而戒荒方今海寓寧謐鞮譯梯航

恩洽九宇風行萬方然而兜牟之士漸已遠羈勒而親希履沓革之旅亦且鄙弧矢而慕縹緲夫變古者勢趨

於積弱而保泰者力矯於蹈常此

聖主所為撫時增惕兢兢焉循

祖制而振乾綱也顧樂甘暴露而冒風霜也哉

冰嬉賦

宮闕之瓌瑋有太液之潏潏焉吞雲夢儼崑閬承光輪
囿以東峙紫閣宮堯以西敞玉螭蜺蜺而卧波瓊島欽
奎而納爽徒觀其激潏灝漾之奇則研京練都之儔固
已罄形容而殫物象矣迺至緹籥動澤腹堅素練韜景

輕縠收烟含雪比潔寫鏡俱圓布琉璃於西竺種琅玕
於藍田牙檣桂楫無所展黃龍青雀不得前雖鴈鵠與
騷衷莫不顛踣而述遭偉冰嬉之特創緊國俗之相
沿匪獨因難而見巧正以鼓勇而爭先武以是肆惠以
是頒將鞠旅以整衆地莫便於上蘭於是

天子出建章而歷鵷鵠莅西苑而臨觀斯時也羽林攸
飛之羣期門七萃之士摩厲以須延頸以俟雲合鳥集
森列乎瀛臺之涘既迺建綵旂分部署鶴翼張魚麗布

颺赤旃而高舉脩策足以驚驚植如立鶴縱若脫兔眇
曳練之難追激流星而急注或翼軀以駢馳或摩肩而
徑度或乘間以投會或側出以詭赴或複疊以攢促或
泮散而布濩或炫奇而賈勇忽迴旋而返顧或趨勢以
直前尚踈足而拘怒赫赫烈烈若周家流火集赤烏皓
皓皚皚若曲江奔濤翔白鷺呈能屢變周覽忘倦颺飛
電迅波譎雲亂咫尺而利鈍殊瞬息而後先判信輕趨
慄疾之超倫軼羣殆亦如僚凡郢斤之官止神行而術

優於簡練也俄而堅壁對壘別曹分局圓鞠突起衆目
所屬其起也機賊激發而騰擲於當空其墜也星隕鵲
落而晃耀於晴旭隨所指而爭趨擬所向而競逐或仰
接以聳躍或俯拾而踟躕或覲面而惚恍或入懷而可
掬或辟易以窅入儼驪珠之在握或俛得而復失洩餘
憤於一蹴非致果以闢捷徒悵惘而躑躅獲雋者氣盛
而若矜失志者色沮而增慙若是者順乎天時氣則隆
烈覘乎地脈厚踰數尺司寒秉權凌人甫飭考幽風則

冲冲未鑿驗楚辭則戔戔已積慮夫歲晚務閒而士氣
之或懈也用習勞於獮狩之隙申號令立賞格威燁於
馮夷之宮聲震於鯨人之宅更詳其服用則障膝以韋
薦履以革藏刀為脊著齒非屐夫是以馳不藉騎飛不
假翮行非翔武踊無留迹泠然憑虛御風何其善也仙
乎拊髀爵躍又何幻也鸞鳳襍瑤池宴也虎豹股栗
昆陽戰也式遵舊典匪武是炫也助以豫行大賚渙也
檄夫角觝拔河之為戲投石超距之奏伎徒以壯軍容

之有爽曾何足語乎勇智而況重之以明賜廣之以仁
義皇哉我

興朝之垂制也爾迺迴

清蹕載鸞旂弭屬玉

御黼惟凝神騁思援毫而賦之萬斛泉湧九天雲垂班
楊帽懾東馬披靡焜煌盈軸圭晷未移將以紀歲華闡
前規推

恩澤示來茲非特補藝苑之未備競藻采於文辭也

宣示近列瞻誦睥眄有

詔繼作惶汗莫支敢以螢爝仰曜朝曦臨文詰屈鄙拙
自嗤敬為頌曰歲既晏兮重陰凝訓材武兮時亟乘軺
恩施兮屬威稜

天章倬兮萬世是徵循令典兮福履膺

夜亮木賦

戴斗之區擊壤之儔且耕且牧以蘇以栢暑雨既溽澤
潦未收嵐霧蒙晦鳥道阻修堂密迴互榛薄蚺蜺忽見

夫晃朗晶瑩璀璨洞明噓燄非紫揚輝正青騰金蛇而
未掣皚火樹之初熒豈傳薪之炯炯將遺燎於星星爰
躡蹠而俯拾煒灼爍而高擎歸而詫其父老曰叟有覲
於此者乎是何仙木之降靈也時則龐眉三老攜杖鳬
趨愕眙懽懽顧語其徒曰於樂山莊實惟天都翳昔
神堯在御治軼華胥蓂莢生階萐莆扇廚薰風清暑駐
此輿區山川畢獻其瑰異卉木殫効其珍符聿有亮木
曜於山隅枝膚剝落炳蔚特殊豈伐樹於撐輪乍分月

桂若浮槎而貫斗應掩星榆爰經

聖鑒麗製霞敷增輝緹縹垂比球圖懿我

皇之續緒丕紹休於

列祖臨玉塞以行秋歷長原而講武曰止曰時方壺懸
圃亶

天光之照臨雖朽木其作覩殆以供

清賞於幾餘勒

鴻篇於冊府也歟彼隋侯明月之珠田父夜光之璧上

林則鼂采碧琳西都則玫瑰絳栢麗則麗矣終濟夸而
多僻又若瑤芝九光華蓋百影舍利現燈於浮圖朱霞
曜靈於丹井奇則奇矣亦不誕之徒逞豈如茲木太樸
未散大椿靈莫莫知其算幸逃匠石之斤且免中郎之
費雲蒸日暄精鑠氣鍊厥靈乃瑩其輝有爛雖潛處於
幽遐恒昭晰而達旦諒積久而自彰詎因人而始銜是
宜洒金壺摘

宸翰攄藻采之陸離倬為章於雲漢也聞者矍然而興

曰嘻歟猗歟方今

日月之華容光必照螢燭之微亦舒其曜棟梁系楠任
各得宜枯木之末亦且弗遺泯我知識順

帝之則慶斯木之遭逢允克彰夫

聖德

神樹賦

氣佳哉鬱鬱葱葱啟運龍從積扶輿之磅礴稟造化之
龐鴻天江帶繞而浩沔長白孕脈而穹窿緊高山之天

作諒王氣之攸鍾夫是以兆

靈域閣

珠宮奉弓劍衣冠於

四祖列左昭右穆以相從厥有奇樹挺秀

崇封周圍徧覆宅是正中其樹維何稽類曰榆既儼枌
於漢社實列種於天衢竦幹千尋比扶桑兮麗金烏敷
蔭百畝齊建木兮拱仙都垂英歲蕤澍甘雨兮三月飛
錢錯落颺和風兮五銖極櫛櫨欒梔之壯觀炳儲禎毓

瑞之貞符固所以培本支於百世肇

帝緒而闡

皇圖者也原夫大命既集有開必先殷頌發祥溯立子
生商伊始周崇追王自古公亶父而前懿厚植之非偶
羌篤生兮自天其深根固本之輪囷盤旋潛達九淵也
有以昭

祖澤之永延其交柯萃葉之菁英攢藥蔭蔭萬年也有
以徵

帝祉之來駢是將參天地而無極豈徒婉春秋之八千
矧夫炎運興而樓桑鬱李唐起而仙李蟠亦何殊寸莛
之視樛木又烏可以挈量而衡觀也哉爾其屆白藏閱
西顙宵露靈霽以沾濡飛烟變黶而繚繞秩秩几筵童
童羽葆御

安輿而歷邠岐揚和鸞而莅豐鎬追

遠展裡奉

先思孝勤

丹陵兮崇椒仰修幹兮虛表薦神樹之嘉名撰

星漢之盛藻蓋匪特維桑與梓之敬恭更無論琪樹瑤
林之瓌寶也矣系曰偉瑞樹兮

神式憑森尊尊兮鬱繩繩如松栢兮無不爾或承篤祜
錫羨兮第祿增子孫千億兮

帝祚凝

皇清萬葉兮此其徵

日月合璧五星聯珠賦

皇帝握乾符闡坤珍參兩大撫三辰澤滂九域恩覃八
垠平章之化協熙皞之俗醇太和翔洽祥光氤氲甘雪
霏微而布潤靈雨優渥於當春

天庥滋至景貺畢臻爾迺象緯清明乾文炳煥二曜合
彩於一垣五佐聯輝而有爛姬訾近值於乾宮營室斜
連於碧漢匪疾匪徐或聚或散參差互映象圓璧之同
規錯落齊升儼編珠之共貫豈第聚奎聚井美盛世之
昭回重光重輪賡載歌於復旦時則青帝司方夾鍾應

律仲月則節號中和庚午則詩云吉日順時耀采辰方
會乎降婁應候流光街自臨乎昴畢近 熙朝之純嘏
適符太史之占溯上古之歷宗奚數義和之術有以知
氣數之綦隆是以覩

聖人之首出斯時也神靈悅豫朝野懽騰僉踴躍忭舞
合詞而稱曰於哉

聖主之祥徵也仰重離之懸象將表瑞於升恒燦五行
之順序亦呈慶於豐登矧曠世而不覲遇

聖主之時乘昌期既應景福誕膺延禧錫祚以莫不增
天子方穆然改容勤思至道欽

昊天以凝休揚

神功而展孝却賀典而弗居

命祠官而祇告戒百僚使修庶政敦誠心而去文貌祥
既降而治益昌福彌隆而德彌劭固當炳圖牒而薦貞
符邁羲軒而宣顯號臣管窺雖陋無能繪日月之華而
槩扣為愚竊願傾葵藿之照謹拜手稽首歌曰惟

天為大我

皇則之

聖祖垂裕我

皇式之惟

天惟

聖孚佑我

皇中天景運
婉於陶唐於
萬斯年載篤
其慶申錫無
疆

永昭瑞應

聖主臨雍禮成賦

聖天子學由天縱治本素王元靈互宅道妙淵藏庚符
耀於太乙珠猷動於文昌卿雲晨露之祥已接心源於
玉冊鳳翥鸞翔之額先褒

聖德於

宸章釋奠時行重一王之典禮大昕早至臨萬仞之宮
牆於是吉日維占頌儀式好率有位以駿奔儼在宗其
載考德車樂御既中矩以折旋義路禮門自升堂而達

與五雲有色拂馬隨人萬騎無聲清塵洒道冠裳肅穆
分三翼以迎

鑾黼黻輝皇擁九旗而入廟爾其朱甍巍赫瑤拱葳蕤
徹瓦流黃侔

皇居之壯麗園池深碧蕩學海之漣漪古樂備陳靜聽
八音之奏

聖躬載獻特隆三爵之儀鳳蠟神椒共祥烟以宛轉太
羹元酒隨甘露而淋漓已乃潛神六藝訪道五更燦天

經而彰地緯啟玉振而節金聲石鼓流音笙鏞迭響縹
緗發彩紳綬俱榮詣極中和探微言於性命功隆格被
厚至德於欽明式玉式金發微顯闡幽之旨如綸如緯
扶躬行心得之精且復聞苑興才舉賢勸學善宜有後
衣冠則儒秩留詔祭復增田蘋藻則馨香綿邈僣僣之
胄子齊登楚楚之儒衣盡擢西膠東序陳七代之文
章春誦夏弦起三千年之禮樂於是斯文益著吾道彌
尊既沐日而浴月亦苞乾而絡坤玉篆金鐫義洩素符

之秘崇牙樹羽人來觀國之賓望類璧之和風悉成元
氣盼園橋之流水亦載春溫良以廷獻本於家修民興
始於經正惟成均之作人實遠邇之逃聽故四術以董
其成七教以防其性豈特菁莪棫樸俱受範於洪鈞即
烏弋黃支亦凜遵夫

聖訓惟大觀在上作君兼之作師斯從善如歸希賢引
之希聖故能治冠百王禮承三統運啟文明功歸風動
析理於天根月窟本聖德為王猷殖學於義種禮耕由

明體以達用臣幸列清班得親扈從聞性道而心愉近
溫恭而神聳觀光有慶追盛典於唐虞拜手何言愧清
風於雅頌

聖射賦

候屆長嬴日躔東井甘雨時暘火行晝永朝霞鬱起而
絳霄陽烏騰出而曜景羽衛宵嚴清蹕稱警

皇帝體天經於夏清詣

璿宮而晨省已乃弭蓋於紫苑之門駐輦於清涼之境

斯時也王公侍列虎旅景從肅肅習習師師顯顯方嚴
威而儼恪匪顧盼而稱雄

天子撫令序而申助陽之義臨羣辟而觀游藝之工於
是抽朔蓬之勁蕤彎鉅黍之良弓張三侯而示鵠規百
步而懸熊一矢初飛奔流星而直注六鈞乍發寫滿月
於當空青鏃儵躡而掣電鳴散姦拉而激風白羽複沓
而相乃紛胡先後而疊雙固已偃甘蠅而伏飛衛蠡門
空石之倫愕眙而慚其技窮矣我

聖皇迺優游恬懌神酣氣逸巧因難而益見奇翻新而愈出正明舊畫弼五色以裁雲埒樹崇儀暈重圓而映日錦標立處徑方寸以成規玉尺量來僅三分而得一形才似葉誰窺養叔之長視豈如輪妙畫紀昌之術應弦則銖黍之無差破的則十發而不失於是衆目駭歡聲溢喜動

天顏

德音有秩爰

命小臣為賦以述沉思愴恍莫能命筆慙忸遷延經月
乃出臣聞射之為道也巧由心得藝以德成體直由於
志正手敏貴其氣平狸首之表應騶虞之節明禮樂於
焉而備慶賞由是而行故先王以之觀德而君子取其
無爭乃有蜻翼矜長猿臂稱善盃措肘而不知扎合七
而能貫開石以飲羽驚竒射戟以中支自炫或積歲以
殫思或彌年而罔間庖丁滿志以躊躇斲輪得心而棄
傳匪助長以偶合亮致精於習慣是惟曲藝之偏長曷

足語

神明之獨擅於我

聖皇小征大匡文思格被武烈用光盛德所孚肅慎貢
其石砮威稜所燁荒徼靖其封狼而猶兢兢乎保大定
功之匪易翼翼乎詰戎肆衆之忽忘伸

廟勝於橐弓之日運宏圖於省括之方猗覲揚之遠畧
屢焜燿於

天章矧夫矢不徒注弦無虛控巧非智力可階道以從

容而中觀者但知應手之為樂究莫測因心之妙用巧
喻者未足罄其形容善鳴者安能據其聲頌是蓋出之
聖德之緒餘要益信多能之天縱頌曰弦剡之利威天
下兮發彼有的娛清暇兮虎韞象弭爍方夏兮矢矢相
屬臻神化兮惟精惟一斯其為

聖射兮

松泉集卷一

欽定四庫全書

松泉集卷二

吏部尚書汪由敦撰

頌

聖主躬耕藉田頌

謹序

皇帝御極之二年春二月癸亥舉行藉田典禮

皇帝親享 先農乃秉耒三推親王九卿以次助耦大
禮告成民人和洽於是在廷諸臣作為歌詩雍容揄揚

紀述

聖德

臣

草茅諸生被薦纂修明史得蒙引

見仰望

穆穆之光自幸遭逢私勤祝頌恭聞盛典倍切歡欣

臣謹惟周頌三十一篇其間為農事而作者居五之一

是惟古先聖王周知稼穡之艱難勤於民事故一時臣
工美盛德之形容以其成功告於神明而聖人取之垂
教萬世豈鋪張夸飾云爾哉欽惟我

皇上宵旰勤勞茂圖上理重農務穀子惠元元祈年憫
雨召致休應粵元年秋嘉禾獻瑞茲惟東作之始甘雨
應時

誠敬感孚

天心和會四海臣庶咸曉然知

帝藉千畝所以虔奉粢盛教民務本修舉故事不為具
文是不可不繼豐年良耜之作昭示將來以興無逸豳
風相為表裏臣才識淺陋竊附田夫擊壤之音拜手稽

首獻頌曰

皇帝御宇百度修舉庶績熙兮嘉我農事率作罔怠樂
乘時兮倬彼東田 御廩出焉薦明粢兮爰

命有司撰日具儀潔 齋宮兮良辰既屆龍旂校校屬
車從兮穆穆顒顒圭幣是供享 先農兮土膏時動誕
播嘉種勤

玉趾兮耜田昀昀葱蒨在轅秉黛耜兮三推既備衆耦
載肆我

皇燕喜兮臣慶於朝農忭於野戴義堯兮普天率土依
我

后之祐

聖躬勞兮有雨如膏字我良苗四序調兮惟

帝格

天迄用康年不為名兮農夫克敏返淳敦本慶盈寧兮

億載無極順

帝之則揚頌聲兮

聖駕親詣太學大禮慶成頌

謹序

雍正二年春三月乙亥朔

皇帝親詣太學釋奠於先師殷禮肇稱先期致戒厥明行事登拜奠獻嚴敬有加翟籥笙鏞既和且備乃

御彝倫之堂正坐進講扈從大臣稽首賜坐諸生環拱而聽宣揚

聖訓大溥

德施翌辰復頒

上諭一章懸揭中庭勉諭諄至洋洋焉濟濟焉曠世之
盛典也洪惟我國家文明之運景燦無疆

列聖開基石文稽古

聖祖仁皇帝壽考作人超軼百代

皇上握符建極適當重熙累洽之時樂育賢才振興儒
術

御門之始疊沛

德音尊崇先聖加封五代王爵茲者涓期視學復

勅臣工勿稱臨幸所以致敬於先師者至隆講筵甫竣即

命廷臣集議先賢從祀之典子孫增置博士所以加禮於儒先者至優元年

特開鄉會恩科至是復增國子生解額十八名復五經試額廣學宮弟子員所以教勵人才嘉惠士子者至深且厚大小臣庶親被

道德之光華懽忭鼓舞僉拜手言曰

皇上大德純孝躬聖人之行以啟牖斯民舉凡興道致治立政用人無一不本於聖人之道而於教化本原尤加意焉唐虞三代之隆復見今日史冊所傳建武中元之世方領矩步委蛇三雍冠帶縉紳園橋億萬者抑云末矣臣以太學諸生幸與觀德不揣固陋謹依古體作頌十有二章章八句恭紀盛事進呈

御覽臣曷任踴躍忭舞之至詩曰

皇矣

聖皇丕承景命黎民時雍萬邦表正

世德作求緝熙執競建元凝道以

聖契

一章

仰惟先師至教斯溥日月同明天地同古遐溯靈源

曰高曾祖晉封肇祀曠典具舉

二章

煌煌辟雍王化之基

神聖首出作君作師爰咨禮臣爰秩禮儀爰飭丹雘宮

牆禕而

三章

惟莫之春月吉辰良和鸞鏘鏘太常央央大昕鼓衆集
於虞庠

天子穆穆芹藻有方

四章

黼座載升戟門載啟胄子僉僉多士濟濟旅進於廷肅
展其禮有睟

天顏嘉樂豈弟

五章

浴爾儒臣肅事法筵笙簧六藝羽翼羣賢道源聖海義

蘊敷宣陋彼東觀訓詁是研

六章

洋洋

聖謨詔爾多士希聖希賢自孝弟始毋華其言而棄厥
美如津有梁如塗有軌

七章

惟

聖作則以身立教惟士克敏幼學嚮道以率蒸民是則
是倣修厥天彛順彼先覺

八章

繫惟

列祖仁漸義摩我

皇紹休德洽太和麟遊郊極鳳翹卷阿惟元與凱疇足

云多

九章

肆惟元祀英賢彙升媚於

天子霞蔚雲蒸俊乂勅職棄瑕錄能惟

帝時舉郁郁其興

十章

敦崇四術慎徽五典懿彼賢關倡於首善

文命覃敷

皇猷載闡盛治彌隆教澤彌遠

十一章

鬱鬱泮林青青子衿承風仰化懷之好音

帝德廣運春盎淵深萬年景祚伊始自今

十二章

河清頌

謹序

臣聞洪源啟瑞昭景貺於昌期巨瀆呈祥表休徵於盛
世惟凝承之有自斯福應之駢臻欽惟

皇上道合清寧功隆位育以敬

天之心敬

聖祖純誠昭格於

宸衷以事

親之心事

昊蒼大德允孚於

帝載仰觀象緯則聯珠合璧遙溯四千餘年之久僅覩
殊祥俯察地靈則嘉穀神禾多至一十三穗之奇頻書
上瑞以至 上林佳植 內苑駢枝寶玉遙呈珍符迭
告莫不表

天心之庥佑彰

聖績之光昌茲惟丙午之冬聿睹河清之瑞地連雍豫
互二千里而淪連境達淮徐經十數州而澄澈挹清波
之浩渺肇自嘉平攬碧浪之潏洄再經旬日考諸圖錄
允稱大化之徵載在瑤編咸曰太平之應是惟我

皇上深仁洋溢至德涵濡恩膏與積潤偕長愷澤共洪
流俱遠官方澄敘竝懷洗滌之忱政教清明誕布激揚
之化是以靈貺應期而翕集河流獻象於隆平蓋慶澤

綿長顯示

上蒼之眷命而

天休滋至端由

聖治之感孚也時則

特沛綸音益崇敬德仰

鑒觀之有赫昭事彌虔慶

申錫之無疆明裡祇薦亮天工而熙庶績務期共矢公

忠修人事以答洪庥惟有益加懋勉

恩覃寮寀懽洽臣鄰當茲

景命之溥將愈見

宸修之邃密固宜天顯神符坤昭靈契鴻嘉丕集繁祉
駢膺豈惟榮光表異於成周龍馬效靈於帝世者哉

臣

幸際

聖朝忻逢瑞應謹拜手稽首獻頌曰

聖皇御宇兮景運昌

躬盛德兮綏萬方

天心順兮錫百祥慶清寧兮樂阜康黃河水兮來天上

出龍門兮喧濁浪歷萬古兮流決濟湛激明兮昭瑞貺
歲在午兮月惟涂浹三旬兮屆春初溯自陝兮達淮徐
河流縈兮水盤紆渟泓兮清泚計上下兮二千里時經
久兮地邈遙超邃古兮始觀此仰

峻德兮豐功持兢業兮

皇衷篤誠孝兮神明通格

列祖兮契

蒼穹日躋兮

聖敬

天申兮寶命勵咎倣兮飭庶政福彌厚兮德彌盛彰嘉
應兮表祥徵

聖治光兮萬福膺川方至兮莫不增億萬年兮頌升恒

聖主躬耕藉田頌

謹序

皇帝御宇之三年二月吉亥

躬耕於千畝之藉肇舉鴻章光我

皇度司天先期而練日禮官敬事而撰儀京兆奉常各

率厥典王公卿尹齋祓從事

天子乃盛禮服陳法駕造乎青壇敬享先農禮備樂和氤氲肝鬯爰頓大次良時既奏迺履

御畝而秉耒焉嘉種載於青箱紺轅綴於黛耜蔥蒨在服洪縻在御三推有加過勞靡倦王公以次具如令式耆老庶民奔走竟畝典禮告備稽首致慶鳴

鑾旋蹕大樂振作將事之時油雲霏霏靈雨霑灑土膏滋液長阡蒸潤

天和神休如響斯應臣民環觀踴躍欣忭臣伏覩我
皇上光紹鴻基

帝德廣運

郊壇致敬

宗廟致孝懷保萬邦

恩滂施厚

九重之上穆清之中昧旦匪懈歷求寧莫作民父母深
悉其艱難疾苦用使民樂其生物得其所光天之下至

於海隅蒼生罔不勤力務本順

帝之則茲復

躬親播種為天下先丕昭敬

天尊

祖勞民勸相之至意昔人所謂能本而孝一役而二美
具焉者彼第揚厲之詞而我

皇上則設誠而致行之者也臣叨侍 禁近與從班列

謹拜手稽首獻頌曰

農惟政本食惟民天哲后興理穡事攸先矧茲天田虔
供御廩昭薦苾芬時用來諗於赫

世宗敦本劬農朱紘歲御萬邦攸同東作屆時率循儀
式年穀屢豐繫我

帝力我

皇紹休饗

帝饗

親克孝克仁保乂我民咨我下民稼穡惟寶稽於憲章

儀型我

文考肆農夫之勤灼知厥艱俶載

帝藉式勸力田肅肅靈壇田祖是祀
膺膺周原剡剡良耜烏犂斯鰭絲鞭斯柔

皇於親耕于彼中疇習習和風霏霏甘雨土膏畢發宜
我稷黍茂茂彩旗洋洋鼓歌一墀再加於禮既過爰陟
崇臺

臨視衆耦王公班進或五或九爰逮亞旅蓑笠耰耨藉

首臺下

天顏載愉

聖躬勞止禮舉備止載

御齋宮慶覃被止懿我

皇聖德格於太清修

祖宗之典設誠致行風動四方咸舉厥職六府孔修百
穀滋殖土靡弗藝農靡弗勤縱橫阡陌舉鍾如雲鼓腹
康衢食我舊德自天降康時萬時億

聖主臨雍禮成頌

謹序

欽惟我

皇上神明天縱聖敬日躋煥乎文章光被四表海內承
學之士延頸企踵喁喁向風文治彰明曩哉尚矣猶
念太學為賢才之闕教化所自粵乾隆三年春三月
躬釋奠於先師禮成

御彛倫堂儒臣進講

皇上親渙玉音闡明大義維時公卿侍從之臣以及聖

賢胄裔太學生徒環侍竦聽者凡數千人咸得仰瞻

天表親被

道德之光華郁郁乎皇皇乎前史所云辨析異同正坐
自講章句質疑稱制臨決方斯蔑矣臣竊惟太學之制
肇於有虞盛於周而大備於 昭代我

列祖化成久道壽考作人教澤涵濡至深且厚而我
皇上躬聖人之德明聖人之道修聖人之教舉有造有
德之士鼓舞而作新之在詩大雅曰古之人無斃譽髦

斯士而其頌文王也曰於論鼓鐘於樂辟雍其頌武王則又曰鎬京辟雍蓋周先王之德澤相繼久長而於辟雍教學之地復加之意如此棧樸作人卷阿多士德化之成其所由來若斯之遠也且夫堯兢兢日行其道舜業業日致其孝古聖人之加四海未嘗不由於身教我皇上緝熙光明終始典學義軒以來之統孔子所為集大成者既迪知之復允蹈之蘊之為盛德施之為大業純亦不已道積於

聖躬教思無窮烝我髦士於是恢
熙朝之隆緒修虞

庠之上儀

德意龐鴻

恩施溥博傳曰天子建中和之極金聲而玉振之昭景

爍揚洪休述考曩編實惟
今日臣幸覩斯盛敬隨諸

臣之後作為頌歌拜手稽首以獻其詞曰

天佑下民若有恒性克綏厥猷惟

后作聖亶亶

聖皇顧諟明命

聖德之純立誠居敬

一章

曰若先師道德之宗昭揭日月覺寤羣蒙于羹于牆

心源相通有赫其儀式是辟雍

二章

於樂辟雍四方之極式擴舊章是崇是飾宮牆翼如黃
中正色軒楹煥如榜題

御墨

三章

仲月上丁灌獻既親載稽令典載卜良辰載蒞橋門俎

豆莘莘服膺至道執禮斯頻

四章

秩秩講筵煌煌大義探本天道稽古帝治位育中和欽
明文思我

皇身有之後先一致

五章

至教彰矣至道光矣濟濟多士示周行矣覃被海隅澤
無疆矣勉我

皇文德翔矣

六章

於爍我

列祖德洽九宇倬彼雲漢萬物斯覩煦之和風膏之甘
雨觀文化成超軼隆古

七章

隆古之治我

皇承之蹈德詠仁髦士攸宜

身示之教從欲以治於萬斯年作君作師

八章

聖駕東巡頌

謹序

皇帝體天廣運勤政恤民以宥密緝熙為前聖繼絕軌
以達聰明目為萬邦致時雍夙夜孜孜

德隆恩洽乃涓吉夙興誕告中外臣民及東方之文武
官吏若曰我國家崇正學重民依

列祖相承垂為家法用能躋於太和之治朕式型至道
寅黻丕基惟先師有淵源惟

祖宗有成憲其何敢不力期以戊辰歲二月東巡狩親
詣闕里展謁先師由是省方齊魯至於岱岳以察
詢民隱饗報神祇諸臣各謹所司毋費民力毋妨稼事
毋飾外觀以稱朕崇聖愛民之至意諸臣震悚恪共

各効乃職

上乃揚清蹕奉

慈輿星陳天行至於昌平之里

躬薦盟於廟堂儀典周渥禮成載莅岱宗秩祀惟謹風
日融麗天人佑助含生之倫無不忭舞稱慶是行也自
十三氏子姓扈行迎謁臣僚膠庠之士就日瞻雲之氓
以暨幽遐荒僻鄙屋之黎庶無不被澤諸 賜爵秩賚
金幣蠲租賜復之典不可悉數敬道之隆恤下之厚盛

矣至矣臣謹按前古詩歌所紀如時邁之觀民在泮之視學皆僅舉一事而已獨其臣文力所到能使鏗錡炳蔚焜耀萬古欽惟

皇上誠以尊師孝以設教敬以禮神仁以施惠內聖外王之道兼綜條貫金聲而玉振之揆之前古未有倫比臣欣逢盛際適承乏教習庶常吉士雍容揄揚為諸臣先輒忘弇昧謹作頌一篇以推本

至德昭示來許比於前志臣詞不文事則過之其辭曰

巍巍至聖為萬世師彝倫攸敘斯文在茲時惟哲王
奉以出治崇聖有典紛綸歲蕤皇我

聖祖紹先聖之緒聖道凝焉聖政具舉我

皇敬承繩

皇祖武接迹中天寤寐東魯亶亶我

皇聖德日新六籍大醇澤潤蒸民道德心勤匪躬弗親
宮牆畢望仰止曷伸乃撰良辰時邁於東雲罕霓旌旖
旒雍容敬侍

莘興怡怡融融百神警蹕千官景從

皇帝至止既齊既敕鱗笏毛虞黃目駢特彛箚莖芬羽
籥交植禮隆九拜威儀抑抑童童華蓋樹於寢庭雲柯
翠葉翊衛聖靈載啟講筵十翼九經肅肅聖裔
謨詰丁寧無忝爾祖稽首敬聆時中立極惟

聖知聖璇榜丹楹大書表敬顙顙豐碑達天盡性
三朝天章萬古輝映

帝念斯道或原或委少皞遺墟雲官鳥紀亦越元聖赤

烏几几既莅此邦盡舉

玉趾四賢有贊夙夜思存扶樹道脈昭揭朝暾咨爾侍
臣往奠壘尊勒我贊辭表厥里門明德之貽施於孫子
咨十三氏既蕃衍只錫之命服薦彼簠簋載簡厥良與
國胄齒魯國諸生烝徒如雲思樂泮水有藻有芹

帝曰休哉敬業樂羣青青子衿濟濟忻忻大典告具

皇帝曰浴古巡狩禮遐隱弗遺採風觀民補助以時子
哺予貸舟輪車馳崧高惟嶽岱為之宗稽古秩祀樂用

函鐘高謝金泥祕祝登封馨香醴峯岫龍從靈祇格
歆福嘏攸同瞳矐日觀詆蕩天門俯視鴻濛滄溟可吞
仰摩蒼穹星斗可捫作配彼天作鎮厚坤疇則比象聖
道之尊於惟醺聖教如天丕冒天亶我

皇灼知篤好匪惟好之允克蹈之聖曰子民雨露膏之
聖曰育賢德禮導之越三千載如親告之

三聖相承惟

皇其有之

皇帝省方河嶽柔矣中正觀民百職修矣文思光被覃
九州矣維

皇作極甄虞鑠周矣

帝謙弗居致福

聖母集禧孔固如山如阜

天錫

皇帝多益單厚風恬俗熙耆艾富壽顯懿茲行志敬義
章兆民有慶

聖道大光泰山巖巖泗水湯湯於萬斯年

聖澤無疆

聖母皇太后六袞萬壽頌

謹序

皇帝御極之十有六年恭遇

聖母崇慶慈宣康惠敦和裕壽皇太后六袞萬壽之辰

薄海內外羣臣兆民幸覲
昌期踴躍鼓舞

天子乃合億兆歡行大慶禮上

隆徽沛

溫詔稱壽於

壽康之宮受賀於 太和之殿鴻儀丕備繁祉翕駢王
公大臣越中外百執事縉紳衿佩之屬以逮閭閻耆耄
靡不鱗次雲集竭情致忱歌呼頌祝之聲充溢 闕庭
闐仞衢術上下和同懽忭流通雍容乎嘉會炳麟乎隆
文 宮闈盛美自古以來未之有也蓋聞母德之極止
於慈聖道之隆本乎孝盛德至道際於天蟠於地光於
四海通於神明則純嘏集焉鴻禧茂焉非常之慶罕覩

述聞至人以德致之裕如也欽惟

皇太后懿聖自天思齊婉任徽音邁如

璇宮沛恩則實人輟僮悉荷生全

金根遊觀則杖老紅婦納諸煦嫗

尊臨萬寓

福被羣生

皇帝闡天經懋孝治居則候

寢闈出則奉

安輦先意而迎多方以體古稱大孝茂以加焉惟慈致
福理之符也明明純孝洪釐大來道之極也巍巍之德
靡有涯量穰穰之福亦靡有涯量自今伊始眉壽樂愷
歲見而紀增期應而券致賈乎其靡可殫計也已臣幸
備職 禁廷躬逢 盛事用敢推本慈孝之理著明福
德之應謹拜手稽首而作頌曰

於皇

皇清多福單厚 宮闈盛美千古莫覩大慶肇舉

長樂介壽郁乎繽紛華藻繁奏磬磬卽卽祉集禧輳伊
慶之衍惟德之茂洪惟

聖母裕慶凝祥雲以慈溥日因愛長德意所及

恩從風翔豐沛岱嵩逾淮渡江

慈輿所至鴻施滂洋凡斯

盛德詎可勝詳大孝尊親惟

帝是式意諧色愉瞻依朝夕

彤闈問安春暉有懌

青輅時邁雲璈親掖法幢祝釐渙號布澤備舉其儀允
稱其實慈孝之德碩大且隆順氣成象萬福來同雲蒸
川增淵深岳崇昭陽協洽律中黃鐘

萬壽攸濟歡洽

慈宮紫垣天閭佳氣朗融

帝親上壽大愷以樂瓊冊琅函寶篆金鑰

懿德難名鴻號景鑠

丹詔專宣覃恩施博珊網宏開多士抃躍麟遊鳳儀祥

呈六幕羣臣萬民以忭以歡芬志共攄潔誠竝殫拜颺
頌歌魚雅聯駢於爍炳煥冊府雲箋康衢黃髮夾道迎
鑾梯航鞮譯就日瞻

天瑤島維南名叶呼萬蘭若香臺鐘魚唄梵

珠軒鸞駕河源星漢琅璈鏘鳴燈綵紉縵海屋濤湧赤
城霞燦冬溫於春宵朗若旦衢歌巷舞曼衍魚龍蓮華
桃實交映春松浮邱仙伯往往相逢忉利之市蓋珠之
宮西賁南琛異鼎壁琮飛采走光殷地耀空猗歟盛哉

尊養兼至樂以天下盛德所致惟

皇帝孝迓此繁祉合天下福永綏

壽履惟

聖母慈膺此大美合天下福增益壽紀煌煌典禮郁郁
茂祺伊古以來疇克臻茲日升月恒天保陳詩

厚德載福今親見之嘉祥流行純嘏緝熙億萬斯年

聖壽攸宜

御書戲綵堂頌

謹序

都御史兼翰林掌院學士徐公以文學宿儒出入
廷者四十餘年數得拜

御書之賜為內閣侍讀學士時

天子親灑翰墨顏其堂曰戲綵當是時太夫人年七十
餘公年亦且六十左右孝養怡怡愉愉

天子嘉之因取老萊子事以寵之蓋異數云傳稱老萊
子行年七十身著五色斑斕之衣弄鳥雛親側為嬰兒
戲其親樂而忘老以是為能娛其親者是以君子稱焉

然則士君子立身揚名遭時遇主受希曠之典以為侍
奉之榮高年在堂色喜神艷樂顧不益大歟太夫人於
公之為員外郎受宜人之誥為內閣侍讀學士受恭人
之誥為巡撫都御史受夫人之誥以大臣母入覲
章皇太后於

慈寧宮錫予宴賚有加

天寵便蕃恩榮稠疊康強善飯膺福未艾其榮遇當有
非萊子之親所能望者惟公之心則不僅以躬被殊榮

為隆於報稱而恂恂孺慕艾齒彌篤所以善娛太夫人者備極家門倫理之樂事

聖天子知公之深而以老萊子之事歸焉在詩四牡之篇其辭及其臣之父母說詩者謂人臣勞其事而不敢言人主探其情而代為之言蓋三代盛王忠厚之至今天子至德大孝體恤臣下而公尤以精白純亮受眷深渥太夫人興居飲食之節嘗蒙

天語垂問明良相得藹然家人之情雖承顏膝下之私

亦且上徹

天聰豈非四牡詩人所未及而為臣子者之至幸耶由
敦之待公也自公之奉使吾浙惟時太夫人迎養行省
公機政之暇入奉色笑昕夕無間越二年即以今官

內召典贊機密載筆

起居蒐狩巡遊必參扈從旬時希得休沐之請然或暫
憩里第問寢視膳惟謹是又異於詩人所稱不遑將母
者而弄雛衣綵之情於昔人洵乎其同之也康熙五十

七年春太夫人八十設悅之辰由敦忝在諸生奉觴堂
下敬瞻

御書迺拜手獻頌曰

猗歟

宸畫日月麗天璇璣垂露緯坤經乾時惟達尊克被
殊恩休休我公山岱星斗

帝曰嘻哉令子壽母春暉熙熙釀和積厚殖殖其楹耽
耽其除粲粲其裾蹌蹌其趨以婉以愉以嬉以娛倬彼

奎文螭楣承之吉雲榮光爛其縈之龐顏象服福履成
之有美斯堂集祉生祥法醞珍饌花誥

龍章駢肩接趾具為家慶我公燕喜嘉樂壽豈孫曾滿
前英英濟美於萬千春

天語是視

松泉集卷二